

# Авам сактып

*Аялгазы: Владимир Сереннии*

Сериин салгын изиг хүндүс

Секпери чөлбий кааптар –

Хайыралыг авам холу

Хаваам дерин чотканзыг боор...

Авайымның чылыг куспаа,

Авайымның чымчак караа,

Авайымның хензиг холу –

Аян ыры хөөнү болду.

Сыгыргалар үнүн алчып,

Сырынналдыр кыйгыржылар –

Авам үнү: “Оглум, чан!” – деп,

Алаак кежир чаңгыланыр...

Чүрбээш бажым суйбап, чыттап,

Чүрээнге сээп чыпшыр тудуп,

Кара чаштыг чалыы авам

Караан чодуп турганзыг боор...

Караңгы дүн мөңге дүжүп,

Карактарым шимдингиге

Мээң-биле авам дириг

Бедиктер теп, чоруп орар.